

REGULAMENTO DE TÍTULOS, HONRAS E DISTINCIÓNS DO CONCELLO DE BRIÓN.

INTRODUCCIÓN.

A Constitución Española de 1978 recoñece aos municipios, ás provincias e as comunidades autónomas autonomía para a xestión dos seus respectivos intereses. É o artigo 140 o que consagra o principio de autonomía local, polo que o goberno e a administración corresponden a cada un dos concellos.

O Regulamento de organización, funcionamento e réxime xurídico das entidades locais, aprobado polo Real decreto 2568/1986, do 28 de novembro, dedica parte do título VI, artigos 186 a 190, a regular as honras e distincións das entidades locais. Así, o artigo 189 sinala que as corporacións locais poderán acordar a creación de medallas, emblemas, distincións ou outros distintivos honoríficos, co fin de premiar especiais merecementos, beneficios sinalados ou servizos extraordinarios, así como acordar nomeamentos de fillos/as predilectos/ as e adoptivos/as e de membros honorarios da Corporación, atendidos os méritos, calidades e circunstancias singulares que concorran nas persoas galardoadas.

Por todo isto, é manifesta a necesidade do Concello de Brión, en virtude da súa potestade de autoorganización, de aprobar un Regulamento para a concesión de distincións.

Capítulo I. Disposicións xerais.

Artigo 1. Obxecto e clasificación.

1. Os títulos, honras e distincións que poderá conferir o Concello de Brión, incluso con carácter póstumo, para premiar especiais merecementos ou servizos extraordinarios, serán as seguintes:

- a) Medalla do Concello de Brión.
- b) Título de Fillo/a predilecto/a e fillo/a adoptivo/a.
- c) Título de Cidadán/á distinguido/a.
- d) Título de Ilustre visitante.
- e) Méritos ao persoal traballador.
- f) Cronista oficial de Brión.

2. Poderanse distinguir de forma honorífica a persoas, institucións ou entidades dando o seu nome a vías municipais, establecementos, centros ou instalacións do Concello de Brión.

A distinción tamén se poderá materializar mediante a instalación dunha placa.

No caso de establecementos, centros ou instalacións do Concello de Brión, procurarase que estean relacionados coa actividade desenvolvida polas persoas ou institucións obxecto de distinción.

3. A concesión de títulos, honras e distincións recoñecerán méritos extraordinarios que concorran en personalidades, entidades ou corporacións, por ter prestado servizos ao municipio, dispensado honras ou producido beneficios sociais, culturais, turísticos, cidadáns, artísticos, musicais, deportivos, empresariais, científicos ou similares.

Artigo 2. Carácter dos títulos, honras e distincións.

1. Os anteriores títulos, honras e distincións teñen carácter exclusivamente honorífico polo que non xerarán dereito administrativo, nin conlevarán o dereito a ningunha indemnización nin terán efecto económico.

2. As persoas titulares das distincións de medalla do Concello de Brión, fillo/a predilecto/a, fillo/a adoptiva e de cronista oficial de Brión disporán dun lugar reservado nos actos oficiais aos que sexan convocados polo Concello de Brión.

Artigo 3. Revogación.

1. Os títulos, honras e distincións poderán ser revogados se os/as titulares realizan actos ou manifestacións contrarias aos motivos que xustificaron a súa concesión ou que de existiren no momento do outorgamento non o permitirían.

2. A revogación será acordada polo mesmo órgano que concedeu a honra, coa mesma maioría prevista para o nomeamento, logo da tramitación do correspondente expediente e de dar audiencia á persoa interesada ou ás que a sucedan.

3. Non poderán concederse os títulos, honras, nin distincións aquí reguladas aos membros da Corporación municipal en tanto exerzan os seus cargos.

Capítulo II. Clasificación e requisitos das distincións.

Artigo 4. Medalla do Concello de Brión.

1. A concesión da medalla do Concello de Brión outorgarase a aquelas persoas físicas ou entidades públicas ou privadas que destaquen polos seus merecementos e a súa traxectoria no sector turístico, cultural, veciñal, artístico, musical, deportivo, empresarial, social, científico ou similares.

2. A aprobación da concesión desta distinción requirirá acordo plenario adoptado pola maioría absoluta do número legal de membros da Corporación.

3. Esta distinción correspóndese coa imposición dunha medalla co escudo do Concello de Brión e coa entrega dun diploma artístico co escudo de Brión, con breve mención dos merecementos e entregarse nun acto solemne, procurando que coincida coa data do Día de Galicia.

Artigo 5. Título de fillo ou filla predilectos.

1. O título de fillo ou filla predilecto/a de Brión distingue persoas, nadas en Brión cuxa traxectoria vital discorra maiormente no municipio, que destacasen polos seus méritos ou calidades persoais, especialmente nos ámbitos cultural, científico, social, artístico, deportivo, político ou económico, ou por servizos prestados en beneficio do municipio.

2. A aprobación da concesión desta distinción requirirá acordo plenario adoptado pola maioría absoluta do número legal de membros da Corporación.

3. Esta distinción correspóndese coa entrega dun pin de solapa co escudo do Concello de Brión e un diploma artístico co escudo de Brión no que constará unha breve mención dos merecementos.

Artigo 6. Título de fillo ou filla adoptiva.

1. O título de fillo ou filla adoptivo/a de Brión poderá outorgarse as persoas que, sen naceren no municipio, manteñan vínculos persoais con ela e que destacasen polos seus méritos ou calidades persoais, especialmente nos ámbitos cultural, científico, social, artístico, deportivo, político ou económico, ou por servizos prestados en beneficio do municipio.

2. A aprobación da concesión desta distinción requirirá acordo plenario adoptado pola maioría absoluta do número legal de membros da Corporación.

3. Esta distincións correspondese coa entrega dun pin de solapa co escudo do Concello de Brión e un diploma artístico co escudo de Brión no que constará unha breve mención dos merecementos.

Artigo 7. Título de cidadán ou cidadá distinguido/a.

1. O título de cidadán/á distinguido/a poderase outorgar a aquelas persoas físicas ou entidades públicas ou privadas do Concello de Brión nos que conorra un mérito ou méritos verdadeiramente singulares, no eido turístico, cultural, veciñal, artístico, musical, deportivo, empresarial, social, científico ou similares.

2. A concesión desta distinción realizarase mediante decreto de Alcaldía, sen necesidade de expediente previo, previa consulta cos portavoces de todos os grupos municipais.

3. Esta distinción correspondese coa entrega dun pin de solapa co escudo do Concello de Brión e un diploma artístico co escudo de Brión no que constará unha breve mención dos merecementos.

Artigo 8. Título de ilustre visitante.

1. O título de ilustre visitante de Brión poderá concederse a aqueles persoeiros de especial relevancia que visiten o municipio de Brión e sexan recibidos oficialmente polo Concello.

2. O outorgamento desta distinción realizarase mediante decreto de Alcaldía, sen necesidade de expediente previo.

3. Esta distinción correspondese coa entrega dun pin de solapa co escudo do Concello de Brión e un diploma artístico co escudo de Brión no que constará unha breve mención dos merecementos.

Artigo 9. Méritos ao persoal traballador do Concello de Brión.

1. O mérito aos traballadores ou traballadoras municipais será outorgado a aquel persoal traballador que se xubilase ou cumprise 25 anos de servizo ao Concello no ano en curso.

2. O outorgamento desta distincións realizarase mediante decreto de Alcaldía, sen necesidade de expediente previo.

3. Esta distinción correspondese coa imposición dun pin de solapa co escudo do Concello de Brión e levarase a cabo nun acto solemne, procurando que coincida coas últimas datas do ano, cando se celebre o brinde de Nadal.

Artigo 10. Cronista oficial de Brión.

1. O título de cronista oficial de Brión poderá concederse a aquelas persoas físicas que acreditaran un profundo coñecemento do pasado histórico de Brión mediante publicacións científicas e actividades culturais relevantes.

2. A proposta de iniciación do expediente deberá acompañarse dunha memoria na que se especifiquen os méritos que concorran na persoa que se propón, xunto cunha recensión biográfica e bibliográfica.

3. O expediente será informado polo persoal técnico do departamento de cultura.

4. A aprobación da concesión desta distinción requirirá acordo plenario adoptado pola maioría absoluta do número legal de membros da Corporación.

5. Esta distinción correspóndese coa imposición dun pin de solapa co escudo do Concello de Brión e un diploma artístico co escudo de Brión no que constará unha breve mención dos merecementos, e levarase acabo nun acto solemne, procurando que coincida coa data do Día de Galicia.

Artigo 11. Dedicación/denominación de lugares públicos de Brión.

1. Correspóndelle ao Pleno da Corporación, por maioría absoluta do número legal dos seus membros a proposta da Alcaldía, outorgar a vías municipais ou a establecementos, centros ou instalacións do Concello de Brión o nome de persoas físicas, organismos, institucións e entidades que, a xuízo da Corporación, reúnan méritos suficientes, sexa por servizos e actividades especiais realizados a favor do municipio no caso de organismos, institucións e entidades, ou pola súa relevancia indiscutible no ámbito científico, cultural, artístico, deportivo, social etc., no caso de persoas físicas.

2. En casos puntuais, e para evitar prexuízos de indefinición transitoria aos/as residentes das vías municipais incluídas neste suposto, poderá empregarse ata que se denominen definitivamente a identificación alfanumérica.

3. Garantírase a equidade de xénero na denominación das vías municipais e dos establecementos, centros ou instalacións do Concello de Brión outorgadas a persoas físicas, en consonancia co disposto na normativa correspondente.

4. As denominacións con nomes comúns corresponde á Xunta de Goberno Local e darase preferencia ao uso da toponimia e microtoponimia local entre as propostas de denominación de lugares públicos de Brión, como mostra do apoio á conservación e posta en valor do seu patrimonio material e inmaterial.

Capítulo III. Procedemento para a concesión de títulos, honras e distincións.

Artigo 12. Iniciación e tramitación.

1. A concesión da medalla do Concello de Brión, dos títulos de fillo/a predilecto/a, fillo/a adoptivo/a, cronista oficial de Brión, así como a denominación de vías ou de establecementos, centros e instalacións municipais, a instalación de placas ou elementos análogos, e o irmandamento con outras vilas a que se refire este regulamento, requirirá a instrución previa do oportuno expediente que servirá para determinar os méritos ou circunstancias que aconsellen a concesión e rexerese por este regulamento, con aplicación supletoria do Regulamento de organización, funcionamento e réxime xurídico das entidades locais (R.D. 2568/1986, do 28 de novembro) ou a disposición que se é o caso o substitúa.

2. Calquera persoa, entidade ou asociación poderá facer propostas mediante escrito presentado no Rexistro Xeral do Concello ou a través da sede electrónica, dirixido ao/a alcalde ou alcaldesa.

3. Os anteditos procedementos iniciaranse mediante decreto da Alcaldía, ou por requirimento dunha terceira parte dos membros que integran a Corporación, para a concesión da medalla de Brión e dos títulos de fillo/a predilecto/a, fillo/ adoptivo/a, cronista oficial de Brión, así como para as propostas de denominación de espazos públicos e irmandamentos.

Capítulo IV. Loito oficial no Concello de Brión.

Artigo 13. O loito oficial.

1. O alcalde ou alcaldesa poderá acordar mediante decreto da alcaldía a declaración de loito oficial cando circunstancias ou feitos de especial transcendencia así o requiran.
2. No decreto da Alcaldía incluíranse todas e cada unha das accións que se vaian desenvolver en sinal de respecto e condolencia.
3. No casos en que a declaración de loito oficial veña acordada por outras institucións ou administracións públicas de ámbito internacional, comunitario, estatal ou autonómico, estarase ao preceptuado pola correspondente declaración.

Capítulo V. Irmandamento.

Artigo 14. Obxecto, requisitos e procedemento.

1. O Concello de Brión poderá decidir o irmandamento con outros municipios, cidades ou localidades co fin de desenvolver vínculos de amizade. É o nivel máis elevado que pode alcanzar a cooperación con outras cidades ou colectividade análogas. Estará baseado na existencia de valores compartidos, vínculos históricos, culturais, lingüísticos, económicos e similares capaces de xerar unha relación permanente entre elas.
2. Os irmandamentos poderán celebrarse con cidades españolas, europeas ou de calquera outro estado recoñecido por España. Non se celebrarán con cidades que pertencen a estados cuxos sistemas políticos non respecten os principios de democracia e os dereitos humanos ou nos que se practique calquera tipo de discriminación incompatible cos valores democráticos, salvo que o seu obxecto específico e preferente de superar esa situación e apoiar a recuperación das liberdades estea debidamente xustificado no expediente.
3. Os obxectivos perseguidos poderán ser:
 - a) Favorecer a creación de sentimentos de proximidade entre a cidadanía, promovendo o mantemento de relacións pacíficas entre os pobos, a resolución de conflitos pola vía do diálogo, a cooperación e o dereito, a tolerancia entre as diversas culturas e civilizacións e, en xeral, os valores establecidos na Carta das Nacións Unidas.
 - b) Fomentar a aproximación da poboación, o incremento do turismo, os intercambios educativos, tecnolóxicos e culturais, e a solidariedade coas situacións de crise ou necesidade.
 - c) Estimular a realización de proxectos que supoñan o intercambio de coñecementos, tecnoloxías, arte e cultura.
 - d) Crear redes de cooperación coas cidades irmandadas para o desenvolvemento de boas prácticas, o intercambio de experiencias e a análise e proposta de solucións en temas concretos de interese común.
 - e) En xeral, calquera outro obxectivo de interese común que contribúa ao establecemento de vínculos de amizade e colaboración para fins pacíficos e de superación dos obstáculos ao respecto e a tolerancia das diferenzas entre os pobos, culturas ou civilizacións.
4. Iniciarase o procedemento de acordo co artigo 11 deste regulamento. Do mesmo xeito, a proposta poderá proceder da cidade que pretende o irmandamento con Brión.

5. O expediente será instruído pola Secretaría municipal, para o que se redactará un informe sobre os vínculos existentes, os obxectivos e as posibilidades de financiamento dos gastos. Terá que quedar reflectida a conformidade do órgano de goberno da cidade coa que se pretende celebrar o irmandamento.

A adopción do acordo de irmandamento requirirá para a súa aprobación acordo adoptado pola maioría absoluta do número legal de membros da Corporación.

6. Salvo que se trate dunha cidade española, a intención de celebrar o irmandamento comunicárase ao Ministerio competente en materia de administracións públicas e ao Ministerio de Asuntos Exteriores para os efectos oportunos.

7. Cumpridos os requisitos anteriores, procederase de xeito conxunto á redacción dun proxecto de protocolo de irmandamento.

8. O protocolo de irmandamento conterá, ademais das mencións xerais de lugar, data, persoas que interveñen e carácter co que actúan, as finalidades e obxectivos que pretenden alcanzar.

Capítulo VI. Libro de títulos, honras e distincións.

Artigo 15. Rexistro.

1. A Secretaría do Concello de Brión, establecerá e manterá un rexistro permanente de todos os títulos, honras e distincións outorgadas, consignando en seccións separadas para cada unha delas e por orde cronolóxica, os acordos de concesión, datas, titulares, motivos do outorgamento, lugar e acto en que tivo lugar a imposición, e, en xeral, cantos datos sexan de utilidade. Este rexistro terá carácter electrónico.

2. Os irmandamentos anotaranse nun capítulo especial do Libro de títulos, honras e distincións.

DISPOSICIÓN ADICIONAL PRIMEIRA.

Mantéñense vixentes a todos os efectos os títulos, honras e distincións outorgados polo Concello con anterioridade a entrada en vigor deste regulamento que se farán constar, no seu caso, no correspondente libro.

DISPOSICIÓN ADICIONAL SEGUNDA.

O presente regulamento permanecerá vixente en tanto non se acorde a súa modificación ou derogación expresa

DISPOSICIÓN FINAL.

O presente regulamento entrará en vigor tras a súa aprobación definitiva, unha vez publicado integramente no BOP e transcorrido o prazo a que se refire o artigo 65.2 da Lei 7/1985, de 2 abril, reguladora das bases do réxime local.

Brión, documento asinado electronicamente.

O alcalde

Pablo Lago Sanmartín